

DOMENIE II «VIE PAL AN»

Antifone di jentrade Sal 65,4

Denant di te si plee dute la tiere
e al to non e cjante, o Altissim.

Colete

Diu onipotent e eterni,
che tu rezis tant lis robis dal cîl che chês de tiere,
scolte cun boncûr lis preieris dal to popul
e regalinus la pâs ai nestrîs dîs.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 49,3.5-6

Ti fasarai lûs dai forescj, par che tu puartis la mê salvece.

Da libri dal profete Isaie
Il Signôr mi à dite: «Tu sês il gno servidôr, Israel,
e midiant di te o fasarai viodi la mê glorie».
E cumò, al dîs il Signôr,
che dal grim di mê mari mi à dât dongje
par che o sedi il so servidôr,
par tornâ a menâi dongje Jacop
e par metii adun Israel,
– e o soi stât alçât denant dai vôi dal Signôr
e il gno Diu al è stât la mê fuarce –
e al disè: «Al è pôc che tu sedis gno servidôr,
par tornâ a tirâ sù lis tribûs di Jacop
e par tornâ a menâ dongje chei che a son restâts di Israel;
par chel ti fasarai lûs dai forescj,
par che la mê salvece
e rivi fin tai ultins confins de tiere».
Peraule di Diu.

SALM RESPONSORIÂL dal Salm 39

R. Ve chi che o soi, Signôr, par fâ la tô volontât.

O ài metude tal Signôr dute la mê sperance,
lui si è pleât viers di me
e al à scoltât il gno berli.
Al à metût su la mê bocje une cjante gnove,
une laut al nestri Diu. **R.**

Tu no tu bacilis par sacrificis e par ufiertis,
tu mi âs vierzût pulît lis orellis!
Olocauscj e sacrificis pal pecjât no tu domandis.
Alore o ài dite: «Ve chi che o soi! **R.**

Al è scrit sul gno cont tal rodul dal libri
che la tô volontât o fasi.
Sì, Diu gno, o vuei fâle:
la tô leç le ài dentri vie». **R.**

O conti la tô justizie te grande seemblee.
Ve, jo no ten sierâts i miei lavris:
tu tu lu sâs, Signôr. **R.**

SECONDE LETURE 1 Cor 1,1-3

Gracie a vualtris e pâs di Diu nestri Pari e dal Signôr Jesù Crist.

De prime letare di san Pauli apuestul ai Corints

Pauli, clamât par volontât di Diu a jessi apuestul di Crist Jesù, e il fradi Sostene, a la Glesie di Diu che e je a Corint, ai santificâts in Crist Jesù clamâts a jessi sants cun ducj chei che in ogni lûc a prein il non dal Signôr nestri Jesù Crist, Signôr nestri e lôr: grazie a vualtris e pâs di Diu nestri Pari e dal Signôr Jesù Crist.

Peraule di Diu.

CJANT AL VANZELI Zn 1,14.12

R. Aleluia, aleluia.

E il Verbo si è fat cjar

e al è vignût a stâ framieç di nô.

A di chei che lu àn acetât

ur à dât il podê di diventâ fîs di Diu.

R. Aleluia.

VANZELI Zn 1,29-34

Ve l'agnel di Diu, che al gjave il pecjât dal mont.

Dal vanzeli seont Zuan

In chê volte, Zuan al viôt Jesù a vignî incuintri e al dîs: «Ve l'agnel di Diu, che al gjave il pecjât dal mont. Chel chi al è chel che jo o disevi di lui: Chel che al ven dopo di me al è passât denant di me parcè che al jere prime di me. Jo no lu cognossevi, ma o soi vignût a batiâ cu l'aghe propit par che al fos pandût a Israel». Po Zuan al testimoniea: «O ài viodût il Spirt a vignî jù sore di lui come une colombe e a fermâsi sore di lui. E jo no lu cognossevi, ma chel che mi à mandât a batiâ cu l'aghe mi à dit: Chel che tu viodarâs il Spirt a vignî jù e a fermâsi sore di lui, al è chel che al batie cul Spirtu Sant. E jo lu ài viodût e o ài testimonieât che lui al è il Fi di Diu».

Peraule dal Signôr.

Su lis ufiertis

Danus la grazie, Signôr,

di celebrâ chescj misteris dispès e cun fede,

parcè che ogni volte che si fâs memorie di chest sacrifici

si colme la vore de nestre redenzie.

Par Crist nestri Signôr.

Antifone a la comunion Sal 22,5

Tu prontis denant di me une taulade

e il gno bocâl al è plen che al stranfe.

O ben: 1 Zn 4,16

Nô o vin ricognossût e crodût al amôr che Diu al à par nô.

Daspò de comunion

Met in nô, Signôr, il spirt dal to bonvolê,

par che, sostentâts cul unic pan dal cîl,

o sedin unîts intun unic amôr.

Par Crist nestri Signôr.